

# Nov model da finanziaziun e cooperaziun intensiva

Conferenza da las uniuns da samaritans grischunas a Tusaun

■ (mc) **La conferenza d'atun da las uniuns da samaritans dal Grischun han gi lieu quest onn a Tusaun. L'uniun ha elavurà in nov model da finanziaziun e vul intensivar la collavuraziun cun l'Uniun da samaritans da la Svizra.**

La presidenta chantunala *Wilma Heini* ha gi ina incarica difficila a la radunanza generala bain frequentada, damai ch'ils temas principals sco la finanziaziun e la furmaziun da samaritans eran gia stads l'onn passà en il center da la sentupada annuala. Las taxas pretendidas engrevgieschan cunzunt las pitschnas uniuns localas e las novas directivas da furmaziun procuran gia daditg per malruaus en il ravugl da las uniuns da samaritans. En gruppas è vegni discutà intensivamain davart questa problematica en preschientscha dals dus preschientants da l'uniun tetgala svizra *Norbert Meier* che tgira la domena da las finanzas e *Mathias Egger*, commember da suprananza ed anteriur president chan-

tunal da Basilea e prendi posiziun a moda cumpetenta ed avarta davart ils singuls votums ch'èn stads parzialmain ualti critics.

## **Tschertgai la discussiun cun nus**

*Mathias Egger* ch'era enconuscent als blets pariticipants sco anteriur president chantunala da Basilea ha pudì calmar in pau las undas furibundas cun sia tenuta concilianta. L'uniun vegnia confruntada adina dapli cun cas complexs e cun midadas frequentas. El ha appellà als preschents da mai emblidar il patratg fundamental dals samaritans che stoppian esser pronts ed abels da prestar l'emprim agid. El ha animà ils presidents da las uniuns da samaritans localas da s'annunziar ad uras per pudair discutir da cuminanza davart ils problems creschents e d'evitar la dissoluziun d'uniuns da samaritans, damai che quellas prestian ina contribuziun nizzaivla per la populaziun e per la sanidad publica.

## **Distgargiar las uniuns pitschnas**

Dals trais models da finanziaziun preschientads han ins dà la preferenza a quel che distgargia il pli fitg las uniuns pitschnas. En quest connex han ins era fatg differentas propostas per pussibilitar a scadina uniun da sa participar a la scolaziun da manaders da curs. Quai era sche la furmaziun da manaders da curs è daventada pli pretensiusa pervi da l'unificziun da la furmaziun e dals novs meds didactics per ils samaritans en l'entira Svizra.

La suprananza da l'uniun chantunala vegn a preschentar a la radunanza da delegadas e delegads da la primavera proxima a Tschierschen las propostas correspondentas per approbaziun. Era *Wilma Heini* ha appellà per conclusiun da la radunanza da tschertgar il discours cun la suprananza chantunala per pudair schliar da cuminanza ils problems e la finala era rinforzar la posiziun dals samaritans entaifer noss chantun.